

**Okwukwo izi
ke Mbom
Polu gbaznennu
Ele Korinti**

Nhne gbasiri okwukwo izi ka

Okwukwo izi Polu gbaznennu ele Korinti ke mbom neelebna anya nu budnu nu okwnata mkpoma ke nye Karaisi. O nookwu oka gbasiri mkpa ke zi nu ogbako Chiokike ke zi nu Korinti ke Polu miteru. Nu ige wam, Korinti bu eli-ohna ke zi mkpa n'eli Giriisi, ke bu risi ochichi eli Rom n'odoru-eli wam. Ele eli ka bu ele be marnu rehna be n'ahia, ele mkpako, nu ele agwa ojo, ele nokponu chi zi ichne ichne risi eli.

Polu nookwu gbasiri okewa nu agwa ojo ke zi nu rime ogbako Chiokike pii. O kwuru nhne gbasiri budnu ogbako Chiokike nu okpukpe, olizo n'enwu, olulu nzi nu nnwerne. O kwuru nu Izi Oma nwernu osisa kpakara ajiji ele ka.

Nu risi 13, Polu gesiri nu owhnun'anya bu ngozi ke kakwo mma Chiokike nyernu ele badnu.

Nhne zi n'okwukwo izi ka

Opanizo (1:1-9)

Okewa nu rime ogbako (1:10---4:21)

Agwa oma nu budnu ezi-nu-oro (5:1---7:40)

Ele Karaisi nu ele naakwa renwu (8:1---11:1)

Budnu ogbako nu okpukpe Chiokike (11:2---14:40)

Olizo n'enwu Karaisi nu ke ele kweru ekwe (15:1-58)

Nkesi ele Karaisi nye ele zi nu Judiya (16:1-4)

Mmụma Pọlu nụ okwukwo (16:5-24)

¹ Mawa, Pọlu, nye Chiokike sukwuru hite n'echiche ma ọ bụru nye izi Karaịsi Jizọsi nụ nnwọ nda aị Sọsitenisi,

² naagbaznenu anụ, ọgbako Chiokike ke zị nụ Kọrinti ọkwukwo. Anụ bụ ele Chiokike sukwuru ma anụ be bụru ele ke a zị nsọ nụ Karaịsi Jizọsi, anụ nụ kpakara ele zị nụ hne ọbula be nọkpokwu rẹwhna Nyenwe aị Jizọsi Karaịsi, Nyenwe be nụ Nyenwe aị.

³ Oru nụ udno ke Chiokike Nda aị nụ Nyenwe aị Jizọsi Karaịsi dazinu anụ.

Ọtu mmamma

⁴ M nọtunu Chiokike m mmamma ige ọbula nụ risi anụ, o nyernu anụ oru hite nụ Karaịsi Jizọsi.

⁵ O mernu anụ ba aba nụ rime Karaịsi nụ kpakara nhne, ma nụ ikwu-ọnu nụ nhne ọmuma anụ.

⁶ Izi gbasiri Karaịsi gwuzosiri rikne nụ rime anụ.

⁷ Kam kpayarụ, ọ zá nkesi ke enine kọgwu anụ kpa anụ neese ige be jookpume Nyenwe aị Jizọsi Karaịsi.

⁸ O jeeme anụ gwuzoru kwem dū ọsoto, ma anụ bụru ele nwée ọru n'ọbochi Nyenwe aị Jizọsi Karaịsi.

⁹ Chiokike, nye sukwuru anụ ma anụ nụ Nnwọ a Jizọsi Karaịsi Nyenwe aị nwekọta nhne, bụ nye kwesiri ọkwnata ovu.

Okewa nụ rime

ọgbako Chiokike

¹⁰ Rụmu nda m, m ji m rẹwhna Nyenwe aị Jizọsi Karaịsi naariasno anụ, anụ bikno, anụ kwekọrita n'otu nhne anụ nookwu, okewa zọma n'esilawuru

anụ. Anụ ziri n'otu n'echiche ma nụ nhne anụ neeme.

¹¹ Rụmu nda m, agwna ele hi n'ezinụ-oro Kilo kannụ m kpa o dnornu m anya, nụ okno ọka zi n'esilawuru anụ.

¹² Ka bụ nhne me naakaa, otu badnụ naakaa, “M bụ m ke Pọlu,” nye berere kaa, “M bụ m ke Apọlosi,” nye berere kwno kaa, “M bụ m ke Pita,” nye berere masị kaa, “M bụ m ke Karaịsi.”

¹³ Be kewarụ Karaịsi sa? Be kpogidnenu Pọlu n'olu ọgba kwnornu anụ? Be wuru anụ mini nụ rẹwhna Pọlu sa?

¹⁴ M nọtunu Chiokike mmamma nụ ọ zá nye me wuru mini kwekọlam Kirisiposi nụ Gayosi.

¹⁵ Ọ zá nye jaakaa sị nụ me wuru a mini nụ rẹwhna m.

¹⁶ (Owe, m wuru m ezinụ-oro Stefanasi mini, be gweme kpam, m máam ma m wuru m nye berere mini.)

¹⁷ Karaịsi zíyage m me wu mini, kovu o zni izi ọma. Ọ búo hite n'ikwu-ọnu ke akoniche badnụ, ọ zị ẹnwu Karaịsi n'olu ọgba bụru nhne etekne.

Karaịsi bụ akoniche nụ iknernema Chiokike

¹⁸ Kwnornu nụ izi gbasiri ọgba bụ nhne etekne hne ele nọonwu ọnuwụ zị, kovu hne ele be nọoznohia zị, ọ bụ iknernema Chiokike.

¹⁹ Be gbarụ a n'okwukwo nsọ, kaa,
“M joolulu akoniche ke ele akọ,
tuwuhu ọghohia ke ele marnụ nhne.”

²⁰ Ndaa hne nye akọ zị? Ndaa hne nye okne okwukwo zị? Ndaa hne nye agirigo ke ọwa ka zị?

Chiokike mernu akoniche ke ọwa bụru nhne iwhnirniwhno.

²¹ Kwnornu nụ hite n'akoniche Chiokike o kwéle ọwa mahia nye ọ bụ hite n'akoniche ke ọwa. Ọ sọru Chiokike n'ọnu o hite n'iwhnirniwhno ke ọkpo okwo izi ọma znọhia ele kweru ekwe.

²² Ele Ju noopio nhne elekema, ele Giriki noopio akoniche.

²³ Kọvu a nọkpo okwo nụ be kpogidnenu Karaịsi n'olu ọgba, ke bụnu ele Ju rugwu ọkpobi ọchi, hne ele bụo ele Ju zị, ọ bụ nhne iwhnirniwhno.

²⁴ Kọvu hne ele Chiokike sukwuru zị, ele Ju ma ele bụo ele Ju, Karaịsi bụ iknernema Chiokike nụ akoniche Chiokike.

²⁵ Kwnornu nụ iwhnirniwhno Chiokike kakwo akoniche ke badnụ, rikne ọgwugwu Chiokike kakwo iknernema ke badnụ.

²⁶ Rụmu nda m, anụ chenwanya nhne anụ bụ sụ Chiokike sukwuru anụ. Agida anụ bụ ele ọwa karụ nụ be nwéé akoniche, agida anụ bụ ele ọwa máa, agida anụ bụ ele híge ezi-nụ-oro eze whụya.

²⁷ Kọvu Chiokike hohiaru nhne iwhnirniwhno ke ọwa ma iwhnerne tị ele akọ. Chiokike hohiaru nhne ele ọwa karụ nụ ọ zịla rikne ma iwhnerne tị ele zị rikne.

²⁸ Chiokike hohiaru nhne ele ọwa lednarnụ anya nụ nhne zá nhne ọ bụ, mee nhne ke be kwuru nhne bụru nhne etekne.

²⁹ O mernu ka ma badnụ ọbula gharụ o mee oknomokno nụ ruwhnu Chiokike.

³⁰ Chiokike mernu anụ nụ Karaịsi Jizọsi bụru otu, nye bụrunu aị akoniche nụ rime Chiokike. Ya bụ ome mma aị nụ ọzi nsọ aị nụ ọgbahia aị.

³¹ Lele kpa be gbarụ a n'okwukwo nsọ, “Nye ọbula ke jeeme oknomokno, o mee oknomokno nụ nhne Nyenwe aị rnụnu.”

2

*Izi ọma gbasiri Karaịsi
nụ ọgba a*

¹ Rumu nda m, nga me vakwnusiri anụ, m jíle m okne ọka mọbu akọniche ke badnụ va kpọ okwo nhne tugwaru otugwa ke Chiokike.

² Kwnornu nụ m píole m ọ marnụ nhne ọbula kpa me nụ anụ zị, kwekọlam nhne gbasiri Jizọsi Karaịsi, nye be kpọgidnenu n'ọgba.

³ M jí m ọza rikne nụ ogwnu nụ ẹhni ọznu biri biri va.

⁴ Nhne me znirni nụ izi m búo hite nụ nkari ọka ke akọniche ke badnụ, kọvu o gesi Enine nụ iknerna a n'esilawuru anụ,

⁵ ma anụ búru ele kweru ekwe, ọ búo kwnornu nụ akọniche ke badnụ, kọvu n'iknerna Chiokike.

Akọniche Chiokike

⁶ Kọvu n'esilawuru ele sozuru osozu bú hne a nookwu ọka akọniche, ọ búo akọniche ke ọwa ka, mọbu ke ele nẹchi ọwa ka. Ige matị, ọ zá nhne be jọbu.

⁷ A nookwu nhne gbasiri akọniche Chiokike ke tugwaru otugwa, ke Chiokike hohiaru kwnornu igwugwu aị tutu sụ ọwa panizoru.

⁸ Ele ọchichi ke ọwa ka máa akọniche ka. Kwnornu nụ ọ búru nụ be marnụ a, be bó kpọgidene Nyenwe igwugwu n'olu ọgba.

⁹ Kọvu kpa be gbarụ a n'okwukwo nsọ, “Anyá whnúlele,

nsnị nùlele,
 ọ bnána n'ovu badnụ rịa rịa,
 nhne Chiokike bítannu ele whnụrnu a n'anya.”

¹⁰ Kọvu Chiokike hiri n'Enine a kpumenu aị
 nhne o tugwaru otugwa, kwnornu nụ Enine
 noonyosna kpakara nhne, ma nhne miri emi ke
 Chiokike.

¹¹ Ọ zá nye magwụ echiche ke mkpọma badnụ,
 o kwolem enine ke zị nụ rime badnụ. Kpam
 masị, ọ zá badnụ ke magwụ echiche Chiokike,
 okwolem Enine Chiokike magwụ kpakara nhne
 gbasịri Chiokike.

¹² A náhịage enine ke ọwa ka, kọvu a nahjaru
 Enine Chiokike ziyaru ma a mahjia kpakara nhne
 Chiokike hiri n'ovu ọma a kesi aị.

¹³ Ka bụ nhne a nookwu, ọ bụo hite nụ nhne ke
 badnụ znirni aị nụ akoniche ke badnụ, kọvu nhne
 Enine znirni aị. A nọkowa ezi ọka ke enine hne ele
 nwernu Enine Chiokike zị.

¹⁴ Badnụ ke nwée Enine Chiokike nwée rikne
 kweru nhne hi n'Enine Chiokike va, kwnornu
 nụ be bụnu a nhne iwhnirniwhno, o nwée rikne
 nahjia be kwnornu nụ Enine Chiokike nọkowanu
 ele nwernu Enine.

¹⁵ Badnụ ke nwernu Enine Chiokike neekpe
 kpakara nhne ikpe, kọvu ọ zá nye jeekpe a ikpe.

¹⁶ Lele kpa be gbarụ a n'okwukwo nsọ,
 “Nyele magwụ echiche Nyenwe aị,
 ma nye wam zni a ezni?”

Kọvu a nwernu echiche ke Karaịsi.

3

Ele ọrnu Chiokike

¹ Rumu nda m, m nwée m rikne kwunu anụ ọka lele ele nwernu Enine, kọvu m nookwunu anụ ọka lele badnụ etekne, lele rumu takiri nụ rime Karaịsi.

² M jeeji mini-rẹma nọoznu anụ, ọ bụo wiri siri rikne, kwnornu nụ anụ jéenwe rikne ri be. Tem dū kịtna, anụ nwée rikne ri wiri siri rikne.

³ Anụ zị kọriri n'anọ-ẹhni, kwnornu nụ okwno-awuwa nụ okno ọka zị n'esilawuru anụ, ka ọ zá neegesi nụ anụ zị n'anọ-ẹhni? Anụ neeme lele badnụ etekne.

⁴ Otu badnụ naakaa, “M bụ m ke Pọlu.” Nye berere kaa, “M bụ m ke Apọlosi.” Anụ zá neeme lele badnụ etekne?

⁵ Nyele bụ Pọlu? Nyele bụ Apọlosi? A bụ ele ẹnu, ele anụ hiri n'aka be kweru. Nye ọbula nọornu ẹnu ke Nyenwe aị nyernu a.

⁶ Mawa kpasiri mkpuru, Apọlosi wụsi a mini. Kọvu Chiokike mernu mkpuru wam so oso.

⁷ Nye wam kpasiri mkpuru nụ nye wam wụsiri a mini bụ nhne etekne. Chiokike zị mkpa kwnornu nụ ọ bụ ya mernu mkpuru wam so oso.

⁸ Nye wam kpasiri mkpuru nụ nye wam wụsiri a mini bụ otu. Nye ọbula jaanarnụ ọgwo ẹnu a lele kpa ẹnu a hna.

⁹ Kwnornu nụ aị nụ Chiokike nọornuko ẹnu n'otu, anụ bụ ẹkwu Chiokike. Anụ bụ ọro Chiokike noowu.

¹⁰ Hite nụ oru Chiokike nyernu m, m nọornu ẹnu lele nye nka-owu ọro. M tūru m ntụ-ẹli ọro, nye berere noowukwasị ọro n'olu a. Kọvu anya dū nye noowu ọro n'olu a ẹli.

¹¹ Kwnornu nụ ọ zá ntụ-ẹli berere badnụ jeenwe rikne tū, kakwo ke Chiokike tūru, ke bụ Jizọsi

Karaṣi.

¹² Ọ bụrụ nụ badnụ ọbula jeeji golu, mọbu siliva, mọbu akaworugwu zị okne ọnu ahia, mọbu isisi, mọbu ruhiara, mọbu isisi ikpa wukwasị ọro n'olu ntụ-ẹli ka,

¹³ ẹrnu a jọowhuya iwhne, kwnornu nụ ọbochi Karaṣi jookpume a. Be jeeji bẹkwnu kpa ẹrnu nye ọbula iru, bẹkwnu jeegesi nhne nye ọbula jiri wu ọro a.

¹⁴ Ọ bụrụ nhne badnụ jiri wu ọro n'olu ntụ-ẹli wam gwuzogidne bẹkwnu, ọ jaanahia ọgwo ẹrnu.

¹⁵ Kọvu ọ bụrụ nụ bẹkwnu rne ẹrnu a, nhne whuru a, kọvu be jọoznohia a, kọvu lele nye hi nụ bẹkwnu whuya.

¹⁶ Anụ máa nụ anụ bụ Ọro Nsọ Chiokike, nụ Enine Chiokike wu nụ rime anụ?

¹⁷ Ọ bụrụ nye ọbula lulu Ọro Nsọ Chiokike, Chiokike joolulu a. Ọro Nsọ Chiokike zị nsọ, anụ bụ Ọro Nsọ a.

¹⁸ Ọ zá nye duhie ẹhni a, ọ bụrụ nụ nye ọbula neeche nụ o nwernu akọ nụ nhne ke ọwa ka, ọ ghọ nye iwhnirniwhno ma ọ bụrụ nye nwernu akọniche.

¹⁹ Kwnornu nụ akoniche ke ọwa ka bụ nhne iwhnirniwhno n'anya Chiokike. Lele kpa be gbarụ a n'ọkwukwo nsọ, "O jidnernu ele akọ n'aghigho be."

²⁰ Be gba kwno a n'ọkwukwo nsọ, kaa, "Nyenwe aị magwụ echiche ele akọ nụ ọ bụ nhne etekne."

²¹ Ọ zị badnụ ke ji nhne badnụ etekne nwernu rikne mee nyaa risi. Kwnornu nụ kpakara nhne bụ ke anụ,

²² Pọlu mọbu Apọlosi, mọbu Pita, ọwa ka, bụdnụ nụ ẹnwu, nhne zị kịtna mọbu ke zị nụ ruwhnu,

kpakara be bụ ke anụ,

²³ anụ bụ ke Karaịsi, Karaịsi bụ ke Chiokike.

4

Ele izi Karaịsi

¹ Ele badnụ kwesiri ọ gwnụ aị lele ele izi Karaịsi, ele Chiokike nyernu nhne tugwaru otugwa ke ezi ọka a n'aka.

² Nhne be pioru n'aka nye neelegidne nhne ọbula bụ be whnụ a nụ ọ bụ nye kwesiri ọkwnata ovu.

³ Nhne anụ nookwu gbasiri m zá m mkpa, mọbu ikpe nye berere neekpe m, m jéekpe ẹhni m ikpe.

⁴ Ovu m zị snam, kọvu ka zá neegesi nụ m bụ m nye ikpe mána. Nyenwe aị bụ nye neekpe m ikpe.

⁵ Kam kpayarụ, anụ kpé nhne ọbula ikpe hne ige yóoduge, seru tem Nyenwe aị va, o jeeme kpakara nhne tugwaru otugwa n'ochichiri whuya iwihne. Ọ jaakahia kpakara nhne zị n'ovu badnụ. Ige wam nye ọbula jaanahia ọznarni a n'aka Chiokike.

⁶ Rụmu nda m, m gweru m kpakara nhne ka tusunu ẹhni m nụ ẹhni Apọlosi kwnornu anụ, ma anụ jiri aị mụhia nhne ele badnụ nookwu, “Ọ zá nye mee nhne be gbáge n'okwukwo.” Ọ zá nye ji otu badnụ nyaa risi megidne ibne a.

⁷ Nyele mernu i, i ziri ichne hne ele berere zị? Kini bụ nhne i nwernu ke be késige i? Ọ bụru nụ nhne i nwernu bụ nkesi, ndaa kpa i jeeji a nyaa risi lele nụ ọ búo nkesi?

⁸ Kịtna, rụwho jihịaru anụ. Anụ balam aba. Anụ gholam eze, ọ bụ n'ezi a búo ele eze. Ọ jaama mma ọ bụru nụ anụ bụ ele eze, ma a snornu anụ bụru masị eze.

⁹ M che m nụ Chiokike beteru aị ele izi aznụ, lele ele be joogbu ogbu, nhne olekiri nyee ọwa, ma hne ele enine izi nụ hne ele badnụ zị.

¹⁰ A bụ ele iwhnirniwhno kwnornu Karaịsi, kọvu anụ bụ ele nwernu akọ nụ Karaịsi. A nwée rikne, kọvu anụ nwernu rikne. Be lednarnụ aị anya, kọvu anụ nwernu igwugwu.

¹¹ Tem dụ kịtna, wiri nọogwnu aị, akpịri nọokpo aị bẹkwnu, a gba ẹto, be mejọru aị, a nwée hne a bịta risi.

¹² A nọdogbu ẹhni aị n'ernu, a ji aka aị nọornu nhne a neeri. Be nọovu aị ọnu, a nọgozi, nga be kpagburu aị, a snuta ovu.

¹³ Nga be kpajarụ aị, a ji ovu ọma sa ọka. A nụ lele nhne mkpomkpo ke ọwa ka, tem dụ kịtna, ele ọwa kwúge aị nhne ọbula.

¹⁴ M zá m naagba ọkwukwo ka ma iwhnerne tū anụ, kọvu ma m zni m anụ ezni lele rụmu ke m me whnurnu n'anya.

¹⁵ Kwnornu nū ọ bụru nū anū nwernu nri pokwu ele noodu anū nū rime Karaịsi, anū nwernu otu nda. M bụ m nda anū nū rime Karaịsi Jizọsi kwnornu nū m gweyanū m anū izi ọma.

¹⁶ M naariasno anū snornu rẹnu ọchi m.

¹⁷ Kam kpayarū, me neeziyanu anū Timoti. Ọ bụ nnwọ m me whnurnu n'anya ke kwesiri be kwnata a ovu nū rime Nyenwe aị. Ọ jeechenwanyanu anū kpa me noowu budnu m nū rime Karaịsi Jizọsi, kpa me neezni nū rime kpakara ọgbako Chiokike ke zị nū hne ọbula.

¹⁸ Agwna anū bụ ele oknomokno, anū neeche nū m jáava lekwa anū.

¹⁹ Ọ bụ́rụ́ nụ́ Nyenwe aị kwere, m jaava kwnusi anụ́ wara wara, m jaamahia nhne ele oknomokno wam jeeme. Ọ bụ́o nhne be jookwu kpọ́i, ma rikne be nwernu masị́.

²⁰ Kwnornu nụ́ ẹ́li-eze Chiokike bụ́o n'agida ikwu-ọ́nu kpọ́i, kọ́vu iknernema.

²¹ Ndaa nhne anụ́ piuru? Me gweru mbinihini va, sụ́ ọ́ bụ́ ovu ọ́whnun'anya nụ́ enine zị́ wọ́hnerne?

5

Anụ́ gweme nnwọ́ nda ke zị́la rị́chna

¹ M nọ́onu nụ́ ome ọ́yi zị́ n'esilawuru anụ́, ke zị́la n'esilawuru ele máa Chiokike, nụ́ badnụ́ nookwuru nnwerne nda a.

² Ndaa kpa anụ́ neeme oknomokno nụ́ kpa? Anụ́ kwesiri ọ́ kwna ẹ́kwna, nwe ovu ọ́jo, anụ́ kwesiri ọ́ chíhala nyerukna ke mernu nhne ka n'esilawuru anụ́.

³ Ọ́ bụ́ n'ezí m zị́ m ikere hne anụ́ zị́ n'anọ́-ẹ́hni, kọ́vu me nụ́ anụ́ zị́ n'enine, m marnụ́ m nye mernu nhne ọ́jo ka ikpe lele nụ́ me nụ́ anụ́ zị́.

⁴ Kpa anụ́ gbakọ́ru nụ́ rẹ́whna Nyenwe aị Jizọ́si, m joosno anụ́ gbakọ́ n'enine, rikne Nyenwe aị Jizọ́si jaadazị́nu aị masị́.

⁵ Anụ́ gweru nye wam yisi n'aka Ekwensu ma o lulu anọ́-ẹ́hni a, ma be znọ́hia enine a n'ọ́bochi Nyenwe aị.

⁶ Anụ́ méma oknomokno, kwnornu nụ́ nhne whụ́ brẹ́di matị́ neeme kpakara brẹ́di whụ́ ọ́whu.

⁷ Anụ́ gweme mmehie ke nụ́ lele nhne whụ́ brẹ́di ọ́knani ma anụ́ ziri rị́chna. Nga wam, anụ́ jọ́onu lele brẹ́di ikne ke nwée nhne whụ́ brẹ́di, lele kpa anụ́

kwesiri. Kwnornu nụ be jiri Karaịsi Nnwọ Atnurnu Ọgawhe aị kwanụ aị ariọhna.

⁸ Ngwa ma a bīta Iriri ka, ọ bụo hite nụ nhne whụ brẹdi ke mmehie ọknani nụ risi rikne, kọvu brẹdi ke nwée nhne whụ brẹdi nụ rime a, brẹdi ke zị rịchna ke nwernu ezi ọka nụ rime a.

⁹ M gbannụ m anụ ọkwukwo, anụ nụ ele neeme ọyi mékọta nhne.

¹⁰ M zá m nookwu gbasiri ele neeme ọyi k'ọwa, ele ọwho-anya nụ ele buznu nụ ele naakwa rẹnwu. Ọ bụru kpm, anụ jọowhoga n'ọwa.

¹¹ Kọvu m naagbanụ anụ kịtna, naakaa, anụ nụ nye ọbula ke kwuru ẹhni a nnwọ nda, kọvu o neeme ọyi, ke nwernu ọwho-anya, nye naakwa rẹnwu, mọbu nye naakaja badnụ, nye okne manya, mọbu nye buznu mékọta nhne. Anụ nụ nye wam dázikota ẹli ri wiri.

¹² Ọ zá m mkpa me kpe ele zị n'ederezi ikpe. Ọ bụo anụ kwesiri o kpe ele zị n'esilawuru anụ ikpe?

¹³ Chiokike jeekpe ele zị n'ederezi ikpe. Lele kpa ọkwukwo nsọ kwuru, “Anụ chihala badnụ ojo wam n'esilawuru anụ.”

6

Ọ kwuru badnụ zne ọro ikpe

¹ Ọ bụru nụ otu badnụ nwernu nhne megidne nnwọ nda, i ga ọla gba nnwọ nda i ọkwukwo n'oro ikpe, ele máa Chiokike kpe be ikpe, tñnuma, o jookwuru a zne n'esilawuru rụmu Chiokike?

² Anụ máa nụ rụmu Chiokike jeekpe ọwa ikpe sa? Ọ bụru nụ anụ jeekpe ọwa ikpe, anụ nwée rikne kpe ikpe ọka matị n'esilawuru anụ?

³ Ọ bụ nụ anụ máa nụ a jeekpe ele enine izi ikpe? Ọ kọ bụru nhne ke bụdnu ka.

⁴ Ọ bụru nụ ọka dnarnụ ke gbasiri bụdnu ka, kịni mernu anụ neekwe ele zị n'ederezi kpe anụ ikpe? Ele ikpe ka bụ ele nwée ọso anya n'ogbako Chiokike.

⁵ Iwhnerne tū anụ. M kweru m nū otu badnū ke nwernu akoniche zị n'esilawuru anụ, nye jeenwe rikne kpe ikpe n'esilawuru rumu nda.

⁶ Tnụnuma, otu nnwọ nda jookwuru nnwọ nda berere zne n'oro ikpe ma ele kwé ekwe kpe be ikpe.

⁷ Anụ naagbarita ẹhni anụ ọkwukwo n'oro ikpe, ka neegesi nū anū dnarnū adna. O jáaka mma nū i bụ nye be mejoru? Ọ jáaka mma nū nhne whunahoru i?

⁸ Tnụnuma, anụ neeme ibne nhne ojo, anụ znunahoru nnwọ nda anū nhne.

⁹ Ọ bụ nū anū máa nū ele ojo jéekheja ẹli-eze Chiokike? Anū dúwhu ẹhni anū, ele naagba ewhere, mọbu ele naakwa renwu, mọbu ele neeme ọyi, ele rukna naadnanyi ele rukna ibne be,

¹⁰ mọbu ele buznu, mọbu ele ọwho-anya, mọbu ele okne manya, mọbu ele naakaja badnū, mọbu ele nọoghogbu ele badnū jéekheja ẹli-eze Chiokike.

¹¹ Agwna anū nū kpam nū mbom. Kọvu be snumarnu mmehie anū, be gweru anū nyewhete n'aka Chiokike. Be mernu anū nū Chiokike ziri n'udno hite nū rewhna Nyenwe aị Jizosi Karaisi nū Enine ke Chiokike aị.

*Kwasinu Chiokike
igwugwu*

¹² “M nwernu m rikne mee kpakara nhne.” Kọvu ọ bụo kpakara nhne naabna mbnarna. “M

nwernu m rikne mee kpakara nhne.” Kọvu m jọjobu ọhi nhne ọbula.

¹³ “Wiri zinu ruwho, ruwho zi masinu wiri.” Kọvu Chiokike joolulu kpakara be. Be jéjeji ẹhni badnu neeme ọyi, kọvu kpenu Nyenwe aị, Nyenwe aị jeeme ẹhni badnu nwehia nhne zi mkpa.

¹⁴ Chiokike nye mernu Nyenwe aị hi n'enu lizo, o jeeme masi anọ-ẹhni aị hi n'enu lizo hite n'iknerna a.

¹⁵ O bu nu anu ma nu ẹhni anu bu nhne zi n'ẹhni Karaisi? M jeegweru nhne zi n'ẹhni Karaisi mee be buru nhne zi n'ẹhni nyerinya ewhere? Oza ria ria.

¹⁶ O bu nu anu ma nu nye gweru ẹhni a yisi n'ẹhni nye ewhere, ya nu a gholam otu anọ-ẹhni? Kwnornu nu okwukwo nsọ kwuru, “Be lawuru jọoburu otu anọ-ẹhni.”

¹⁷ Kọvu nye gweru ẹhni a yisi nu Nyenwe aị, ya nu Nyenwe aị gholam otu n'enine.

¹⁸ Anu gbanahoru ome ọyi. Kpakara mmehie berere badnu mernu zi n'olu ẹhni, kọvu nye neeme ọyi megidnenu ẹhni a mmehie.

¹⁹ O bu nu anu ma nu ẹhni anu bu Oro Nso ke Enine Nso, nye wu nu rime anu, ke Chiokike nyernu anu? Anu nwée ẹhni anu, Chiokike nwe anu.

²⁰ O jiri onu ahia gbahia anu. Anu gweru ẹhni anu kwasinu Chiokike igwugwu.

7

*Ajiji gbasiri olulu
nzi nu nnwerne*

¹ Nhne gbasiri nhne anụ gbarụ n'okwukwo, “Ọ bụrụ ọma nụ nyerukna nụ nyerinya dnányi lele nzi nụ nnwerne.”

² Kọvu kwnornu nụ agịda ele neeme ọyi zị n'esilawuru anụ, ọ bụrụ ọma nyerukna ọbula luru nnwerne ke aka a, nụ nyerinya gbọru nzi ke aka a.

³ Nyerukna ọbula mee nhne kwesiri a lele nzi hne nnwerne a zị, nyerinya ọbula mee nhne kwesiri a lele nnwerne hne nzi a zị.

⁴ Nnwerne nwée rikne hne ẹhni a zị, kọvu nzi nwernu, kpam masị nzi nwée rikne hne ẹhni a zị, kọvu nnwerne a nwernu.

⁵ Anụ gónahoru ẹhni anụ ẹhni anụ, okwolem ma ọ bụ ige matị kpa anụ kwekotaru, ma anụ vu ọnu nụ kpe okpukpe. Omekwo, anụ ziri n'otu berere ma Ẹkwensu gharụ ọ rna anụ ọrnurna, kwnornu nụ anụ nwée rikne jikwaru ẹhni anụ.

⁶ Ka bụ rikne me neenye anụ, ọ bụo iwu.

⁷ N'ezi ọka, ọ jaamasị m nụ kpakara badnụ jaadazị lele me. Kọvu nye ọbula nwernu nkesi ke Chiokike kesiri, otu nyenum kpa, nye berere nkesi berere.

⁸ Kịtna, m naakanụ ele lúge nnwerne mọbu ele gbóge nzi, mọbu ele rinya nzi be nwurnu, ọ jaaka mma anụ daziri etekne, lele kpa me daziri.

⁹ Kọvu ọ bụrụ nụ anụ jéenwe rikne jikwaru ẹhni anụ, anụ luru nnwerne mọbu gbọru nzi. Ọ ka mma ọ luru nnwerne mọbu gbọru nzi, tñunuma ẹhni anụ jeerne bẹkwnu.

¹⁰ Ele nwernu nzi mọbu nnwerne, m neenye anụ iwu Nyenwe aị, ọ bụo ke m. Nnwerne gbákwadia nzi a nnam.

¹¹ Kọvu, o mee kpam, ọ jaadaziri etekne mọbu ọ lahna ke nzi a, nzi gbákwadia nnwerne a nnam.

¹² M naakanu ele ke gwnarnu, ọ búo Nyenwe a, ọ buru nu nye Karaịsi ọbula nwernu nnwerne ke kwé ekwe, kọvu o kweru ya nu a wugidne, ọ gbála a nnam.

¹³ Ọ buru nu nyerinya Karaịsi ọbula nwernu nzi ke kwé ekwe, kọvu nzi a kweru ma be wugidne n'otu, ọ gbála a nnam.

¹⁴ Kwnornu nu Chiokike nabnanyarnu nzi ke kwé ekwe kwnornu nnwerne a ke kweru ekwe. Chiokike naabanyarnu nnwerne ke kwé ekwe kwnornu nzi a ke kweru ekwe. Ọ buru nu ọ búo kpam, rumu takiri anu jọoburu ele zila richna, kọvu be zi nsọ kitna.

¹⁵ Kọvu ọ buru nu ọ masiri nye ke kwé ekwe ọ gba nnam, o mee kpam. Ọ zá iwu ke ji nye Karaịsi, nzi mọbu nnwerne, n'ọnodi nu kpa. Chiokike sukwuru a ma a wuru n'udno.

¹⁶ Ndaa kpa i jiri mahia, ji nnwerne ke kweru ekwe, nu i jọoznohia nzi i? Mọbu ji nzi ke kweru ekwe, ndaa kpa i jiri mahia nu i jọoznohia nnwerne i?

*Daziri n'ọnodi
Chiokike sukwuru i*

¹⁷ Kọvu nye ọbula daziri n'ọnodi ọ zi nga Chiokike sukwuru a, bu ke Chiokike nyernu a. Ka bu nhne me neezni nu rime kpakara ọgbako Chiokike.

¹⁸ Ọ buru nu nye be kparu nka nurnu ikwu Chiokike, o gwépuke nhne atụ ọkpa nka a. Ọ buru masi nu nye be kpáge nka nurnu ikwu Chiokike, be kpála a nka.

19 Ọkpa nka nù be kpáge nka zà nhne ọ bụ, nhne zì mkpa bụ ọbita iwu Chiokike.

20 Badnụ ọbula daziri n'ọnodi ọ zì nga Chiokike sukwuru a.

21 I zì n'ọhi nga Chiokike sukwuru i? O mékpa i ẹhni, kọvu ọ bụru nù i nwernu oghere ọ whọga n'ọhi, mee kpm.

22 Kwnornu nù nye bụ ọhi nga Nyenwe aị sukwuru a bụ nye nwernu ẹhni a nù rime Nyenwe aị. Kpm masị, badnụ ke nwernu ẹhni a nga Nyenwe aị sukwuru bụ ọhi Karaisi.

23 Chiokike jì ọnu ahia gbahia anụ, anụ ghọko ọhi ke badnụ.

24 Rumu nda m, badnụ ọbula daziri n'anya Chiokike n'ọnodi ọ zì nga Chiokike sukwuru a.

*Ele nwée nzi
mọbu nnwerne*

25 Nhne gbasiri ele rinya máa nyerukna, mọbu ele rukna máa nyerinya, m nwée m nhne Nyenwe aị nyernu n'iwu, kọvu m neenye anụ nhne bụ echiche m, nye hite n'obirizi ke Nyenwe aị m kwesiri m ọtukwasi ovu.

26 Mkpa karilam n'ọwa kịtna, m che m nù ọ bụru ọma ọ bụru nù badnụ daziri kpa ọ zì.

27 Ọ bụru nù i nwernu nnwerne? I ghásala a. I nwée nnwerne sa? I lúko nnwerne.

28 Ọ bụru nù i luru nnwerne ọ zà mmehie i mernu. Ọ bụru nyerinya máa nyerukna gbọ nzi, ọ zà nhne ọjọ ọ bụ. Kọvu ele nwernu nnwerne mọbu nzi jeenwe agida mkpa n'ọwa ka, m noopio ọ dọhia anụ nù nhne ka.

29 Rụmu nda m, nhne me nookwu bu ka, ige wam zi ndundu, hite kitna ele nwernu nnwerne ziri lele nu be nwée nnwerne,

30 ele naakwna ekwna lele nu be za n'anya-mini, ele nonu rụmu lele nu ovu za nono be nonu, ele nonu ahia lele nu o za nhne be zuhiaru,

31 ele ji nhne owa ka lele nu o za be mkpa. Kwnornu nu owa ka nonodi a jaagawhe.

32 M noopio ma nhne obula gharu o kpakna anu ehni. Nyerukna obula ke nwée nnwerne neeche echiche gbasiri ernu Nyenwe ai, kwnornu nu o pioru o mee nhne jaamasị Nyenwe ai.

33 Kovu nyerukna ke nwernu nnwerne neeche echiche gbasiri nhne ke owa ka, kwnornu nu o pioru o mee nhne jaamasị nnwerne a,

34 ke nonodoghari a n'apna lawuru. Nyerinya ke nwée nzi mibu ke ma nyerukna neeche echiche gbasiri ernu Nyenwe ai, kwnornu nu o pioru o gweru ehni a nu enine a nyee Nyenwe ai. Kovu nyerinya ke nwernu nzi neeche echiche gbasiri nhne ke owa ka, kpa o jeeme nhne jaamasị nzi a.

35 M nookwu nhne ka ma o bnanu anu iru. M za m noobnosni anu. Kovu m pioru m ma anu mee nhne buru oma nu ke kwesiri ekwesi, ma anu gweru kpakara ehni anu yisi n'ernu Nyenwe ai, gharu o le anya n'aznu.

36 Nhne ke gbasiri ele kwekotaru olulu, o buru nu badnu obula whurnu nu o za naakpakwa agwa nkari hne nyerinya o kweru o lu zi, o buru n'awha neezne, o luru a, be mege mmehie.

37 Kovu hne badnu kpebiri n'ovu a, o za nye naamagidne a nu o jolu nnwerne, o nwernu

rikne gharu o lu nnwerne wam, o mernu nhne kwesiri.

³⁸ Nye ke luru nnwerne mernu nhne oma, kovu nye ke luge rja rja mekakworu nu nhne oma.

³⁹ Nyerinya gboru nzi zi n'iwu kpa nzi a zi budnu, kovu hne nzi a nwurru, o za iwu ji a ma o gboru nzi berere. Kovu o jobu nye magwu Nyenwe ai.

⁴⁰ Kovu n'echiche m, ovu joso a n'onu o buru o daziri etekne. M che m nu m nwernu m Enine Chiokike.

8

Wiri be jiri kwanu

renwu arjohna

¹ Nhne ke gbasiri wiri be jiri kwanu renwu arjohna, o bu n'ezi nu, "Kpakara ai nwernu nhne omuma." Kovu nhne omuma neegweya badnu vulizo ehni a olu. Owhnun'anya noowulizo badnu olu lele oro.

² O buru nu badnu obula neche nu o magwu nhne, o ma kpa o kwesiri o mahia.

³ Kovu Chiokike magwu ele whurru a n'anya.

⁴ Nhne gbasiri wiri be jiri kwanu renwu arjohna, a magwu nu o za nhne renwu ke owa ka bu, kwnornu nu chi berere za, okwolem Chiokike kpoi.

⁵ O bubedi nu agida nhne be nookwu "chi" zi n'oligwe mobu n'owa, o bu n'ezi nu be zi agida "chi" nu "nyenwe,"

⁶ Kovu hne a zi, otu Chiokike kpoi nye bu Nda. O keru kpakara nhne, a zinu a budnu. Otu Nyenwe ai Jizosi Karaisi zi, nye be hiri n'aka a ke kpakara nhne, nye a zi budnu n'aka a.

⁷ Kọvu ọ búo kpakara badnu magwu ezi oka ka. Agwna badnu yiri risi nu renwu du kitna, nga be riri wiri ki, be neeche nu be ji a kwanu renwu ariohna. Echiche ovu be za rikne, wiri be riri kparu be.

⁸ Kọvu wiri jeeme ai nu Chiokike ziri ndundu. A ríle wiri, ọ za nhne o neegweme n'ehni ai, a ri wiri ọ za nhne o neeyisi ehni ai.

⁹ Kam kpayaru, anya du anu eli, i kwékwadia oghere i nwernu nu ome kpa ọ masiri i mee ele za rikne n'okwnata ovu dnabna nu mmehie.

¹⁰ Ọ buru nu otu badnu ke mkpoma síle rikne whnuru i hne i dazi eli neeri wiri n'oro renwu, kwnornu nu i nwernu “nhne omuma,” o jeenye a mkpoma siri rikne o ri nhne be jiri kwanu renwu ariohna?

¹¹ Nnwọ nda wam za rikne, nye Karaisi kwnornu nu a nwuma, joowhu etekne kwnornu nu nhne omuma i.

¹² Kpam, anu mehieru nnwọ nda anu wam za rikne, lulu ovu a, anu mehielem Karaisi masi.

¹³ Ọ buru nu wiri me jeeri jeeme nnwọ nda m mmehie, m jeeri okpna ría ría kpa me zi budnu, ọ zi me mee nnwọ nda m dnabna nu rime mmehie.

9

Rikne nu ernu ke nye izi

¹ Ọ bu nu m nwée m ehni sa? Me búo nye izi sa? Me whnúge Jizosi Nyenwe ai anya? Anu búo nhne me rnuhiaru n'ernu Nyenwe ai?

² Ọ buru nu ele berere whnúge m lele nye izi, anu magwu nu m bu m nye izi. Anu bu nhne atụ ke neegesi nu m bu m nye izi Nyenwe ai.

³ Nhne me naakanu ele nookwulu m bu ka,
⁴ a nwée rikne ri wiri mọbu nwọ mini n'ernu aị sa?

⁵ A nwée rikne mee nhne ele izi berere neeme? A nwée rikne luru otu nnwọ rinya Karaisi lele nnwerne, o snornu aị zne izi lele ele izi ele berere nu rumu nne Nyenwe aị nu Pita?

⁶ Okwokọla me nu Banabasi kwesiri o rnu ernu si a ri wiri?

⁷ Ndaa nye ogwnu ke nọolu ogwnu hite n'iwai ke hi nu rekpa a whuya? Ndaa nye jornu ekwu, ma o jeeri mkpuru hi nu rime ekwu a? Ndaa nye nọoznu atnurnu ma o za nọonwo mini-rem a atnurnu a?

⁸ Me nookwu lele badnu etekne sa? O buo nhne Iwu aị kwuru sa?

⁹ Kwnornu nu be gbaru n'okwukwo Iwu Mozizi, "I knesni onu ehni ke nọozosna ikpa." Chiokike o nookwu nhne gbasiri ehni kpoi?

¹⁰ O kwuru nhne ka kwnornu aị. Be gbaru a n'okwukwo kwnornu aị, nu nye nọtụ onu-eli nu nye nọozosna mkpuru nwernu okwnata ovu nu be jeeri mkpuru hiri n'ekwu.

¹¹ A kpasiri mkpuru ke enine nu rime anu, o buo nhne kwesiri nu a jogghoru mkpuru etekne n'ehni anu?

¹² O buru nu ele berere nwernu rikne kpa hne anu zi, o bu ayila jeenwe rikne karukwo hne anu zi?

Kovu a mege kpa, a nwernu ndidi nu kpakara nhne, o zi a bita nhne okpobi ochi n'apna izi oma Karaisi.

¹³ O bu nu anu ma nu ele nornu ernu n'Oro Nso neeri nhne hi n'Oro Nso whuya? O bu nu anu ma

masi n'ụ ele n'ọornu ẹrnu n'ọjo arịohna neeri agwna nhne be jiri kwa arịohna?

¹⁴ Kpam masi, Chiokike nyernu iwu n'ụ ele neezni izi ọma be ri wiri hiri n'izi ọma whụya.

¹⁵ Kọvu m mége m kpam. M zá m naagba ọkwukwo ka ma m nwernu rikne mee kpam. Kwnornu n'ụ ọ jaakanu m mma me beru ọsno nwuma ẹnwu tna, ọ zá nye mee igwugwu m nhne etekne.

¹⁶ M nwée m rikne nyaa risi n'ụ m neezni izi ọma. Mkpa naakpa m bu o zni izi ọma. Owe! Ọvu ọnu zinu m ọ buru n'ụ m zni m izi ọma.

¹⁷ Ọ bu me gweru mkpoma m zni izi ọma ka, m nwernu m ọgwo ẹrnu, kọvu ọ buru n'ụ jíge m mkpoma m zni izi ọma, m n'ọornu ẹrnu Chiokike yisiri m n'aka.

¹⁸ Ọ buru kpam, kini bu ọgwo ẹrnu m? Ọ bu oghere o zni izi ọma gharu ọ whnu ọnu ahia, gharu o gweru rikne me nwernu n'izi ọma mee nhne.

¹⁹ Ọ bu n'ezin'ụ m búo m ọhi nye ọbula, m nwernu m ẹhni, kọvu m mernu m ẹhni ọhi kpakara badnu ma m rihia m agida badnu n'iru.

²⁰ Hne ele Ju zi, m bu m nye Ju ma m rihia m ele Ju. Hne ele zi n'ụ mkpururu iwu zi, m ziri lele n'ụ m zi m n'ụ mkpururu iwu (ọ bu n'ezin'ụ m zá m n'ụ mkpururu iwu), ma m rihia m be n'iru.

²¹ Hne ele zá n'ụ mkpururu iwu, m ziri lele nye zá n'ụ mkpururu iwu (ọ bu n'ezin'ụ m léwhule m iwu Chiokike anya, m zi n'ụ mkpururu iwu Karaisi), ma m rihia m be n'iru.

²² N'esilawuru ele zá rikne n'ọkwnata oву, m n'ụ m lele be, ma m rihia m be n'iru. M bu m kpakara

nhne hne ele badnu zi, m neeme kpa me nwernu rikne, ma m rihia m agwna be n'iru.

²³ M neeme kpakara nhne ka kwnornu izi oma, ma m kehia m igwe nu ngozi a.

²⁴ N'ezi oka, anu magwu nu ele naagba eso naagba eso n'otu, kovu otu badnu kpai naagbahia nhne eso. Anu gba eso, ma anu gbahia nhne n'eso.

²⁵ Nye obula ke naagba eso jooknekwaru ehni a nkari, ma be kpusi a okpu o gbahiaru n'eso ke jazi okwnukokwnu, kovu a naagba eso ma a nwehia okpu-eze ke jazi okwnukokwnu.

²⁶ Ka kphiaru m za m naagba eso lele nye o za nhne o vu nu mkpoma, m za m nolo igbakwu lele nye nolo ruwhere igbakwu.

²⁷ M naata ehni m awnwhnu ma m nwernu m rikne nechi a, o zi me zikpa ele berere izi oma, m buru nye kwesile okpu-eze wam.

10

O do aka nu nsni gbasiri

Okwa renwu

¹ Rumu nda m, m pioru m anu mahia, nhne mernu ele nda ai oknani ele snornu Mozizi kpa be zi nu mkpururu erumeru, kpakara be gawheru Osimini Ihie.

² Be wuru be mini nu rime erumeru nu osimini ke neegesi nu be sno Mozizi.

³ Kpakara be riri otu wiri enine wam.

⁴ Kpakara be nwornu otu mini enine wam, kwnornu nu be nwornu mini enine ke hiri nu rugwu wam snornu be, rugwu wam bu Karaisi.

⁵ Kovu nhne gbasiri agwna be soge Chiokike ovu n'onu, iznu be wusaru n'eli-ikpa wam.

⁶ Kpakara nhne ka bụnnu aị nhne atụ ke nọodo aị aka nụ nsni. Nhne ojo gwnúko aị lele kpa o gwnurru be.

⁷ Anụ kwákọ rẹnwu lele kpa agwna be kwarụ, lele kpa okwukwo nsọ kwuru, “Ele wam daziri ẹli ri nhne, nwọ nhne onwunwo, be lizọ tne eri.”

⁸ A mékọ oyi, lele kpa agwna be mernu, nri pokwu lawuru nụ pokwu ẹto nwụ otu obochi.

⁹ A kpákọ Nyenwe aị iru, lele kpa agwna be mernu, agwọ tagbu be.

¹⁰ Anụ támu, lele kpa agwna be tamurru, enine izi ke ẹnwu gbu be.

¹¹ Kpakara nhne ka mernu be nụ lele nhne atụ, be gbá be n'okwukwo nsọ, ma be bụru nhne jeezni aị ezni, aị ele zị bụdnu n'okwukwo owa ka.

¹² Nye obula ke neeché nụ o gwuzogwu kwem, ledu anya, o zị o dna.

¹³ O zá orurna ke vakwnusiri anụ ke vakwnusilele badnụ. Kọvu Chiokike kwesiri be kwnata a ovu, o jéekwe orurna ke anụ nwée rikne gwuzoli vakwnusi anụ. Kọvu nga be naarna anụ orurna, Chiokike jeenye anụ rikne o gwuzo, gbamanụ anụ apna anụ jeeji whuya nụ rime a.

¹⁴ Nhne atụ ele ka neegesi, ele me whurru n'anya, ma anụ ghanahoru okwa rẹnwu.

¹⁵ M nookwunu anụ oka lele ele nwernu akoniche, anụ tulekọm nhne me nookwu.

¹⁶ Okiko Iriri Nsọ wam ke a nọtunu Chiokike mmamma, o búo onarna Karaịsi nhne a neekeri nga a nonwo nhne hi n'okiko wam? Brẹdi wam a naanyawa, a zá neekeri anọ-ehni Karaịsi nga a neeri brẹdi wam?

17 Kwnornu nù otu brẹdi zìnu kpakara aì. Ọ bụ n'ezi nù a zì agìda, kọvu a bụ otu anọ-ẹhni, a neeri otu brẹdi wam.

18 Anù tule ele Izireli, ele neeri nhne be jiri kwa ariohna, neekerikọta nhne n'otu n'ọjo ariohna Chiokike.

19 Ndaa nhne me nookwu? Ọ bụ nù rẹnwu mọbu wiri be kwanù rẹnwu ariohna bụ nhne ọbula?

20 Óza! Nhne me naakaa bụ nù nhne ele naakwanù rẹnwu kwarù ariohna bụ nhne be kwannù ele rẹnwu ọjo. Ọ búo Chiokike. M chíoge m anù nù ele rẹnwu ọjo neekeri nhne n'otu.

21 Anù jéenwe rikne nwọ okiko Nyenwe aì, nwọ kwno okiko ele rẹnwu ọjo. Anù jéenwe rikne ri wiri n'ikpechi Nyenwe aì, ri kwno n'ikpechi rẹnwu ọjo.

22 Anù noopio o mee Nyenwe aì kwno awùwa? A nwernu iknernema karù a sa?

23 “A nwernu rikne mee kpakara nhne,” kọvu ọ búo kpakara nhne bụru ọma. “A nwernu rikne mee kpakara nhne,” kọvu ọ búo kpakara nhne nọowulizo badnù olu lele ọro.

24 Ọ zá nye lebna anyà nù nhne ke a, kọvu nù nhne ọma ke jeenyinu ele berere aka.

25 Anù ri nhne ọbula be neere n'ahia, anù síkwa ajiji kwnornu mkpuru ovu anù.

26 Ọkwukwo nsọ kwuru, “Chiokike nwe ọwa nù kpakara nhne zì nù rime a.”

27 Ọ bụru nù nye kwé ekwe sukuru anù ma anù ri wiri, ọ masì anù o zne, anù ri nhne ọbula ọ bítaru nù ruwhnu anù, anù síkwa ajiji ọbula kwnornu mkpuru ovu anù.

28 Kọvu ọ bụru nù otu badnù kanù anù, “Be jiri wiri ka kwanù rẹnwu ariohna,” anù ríko wiri

wam kwnornu nū nye wam kannū anū kpam, ma kwnornu masi mkpuru ovu.

²⁹ O bũo kwnornu mkpuru ovu anū, kovu mkpuru ovu nye berere wam. Ndaa kpa rikne me nwernu o mee nhne jiri gbaṣi mkpuru ovu nye berere?

³⁰ O buru nū me ri wiri tūnu Chiokike mmamma, kīni mernu nye berere jaama m ikpe nū wiri me tūru mmamma?

³¹ Kovu, nhne obula anū neeme, anū neeri wiri mọbu anū nonwo mini, anū mee kpakara nhne kwnornu igwugwu Chiokike.

³² Anū mékọ nye obula dna, mọbu nye Ju mọbu nye bũo nye Ju, mọbu ogbako Chiokike,

³³ lele kpa me naagbalī o mee kpakara nhne jaamasī kpakara badnū. M zá m neeche nhne gbaṣiri nhne oma ke m, kovu nhne oma agida badnū ma be znohia be.

11

¹ Anū snornu m lele kpa me noosno Karaṣi.

Okpukpe nū ogbako

Chiokike

² M naaja anū mma kwnornu nū anū neechenwanya m, naabita kpakara nhne me znirni anū.

³ Kitna, m pioru m anū ghohia nū Karaṣi bụ risi nyerukna obula, nzi bụ risi nnwerne, Chiokike bụ risi Karaṣi.

⁴ Nyerukna obula ke neekpe okpukpe mọbu nookpo okwo izi oma Chiokike kpusnime risi a, bụ nhne iwhnerne nyee Karaṣi.

⁵ Nyerinya obula ke neekpe okpukpe mọbu nookpo okwo izi oma Chiokike, gbesa risi a anya,

neeme risi a nhne iwhnerne, ọ nụ lele ọ kọpuru rukeri-ize risi a.

⁶ Ọ bụru nụ nyerinya kpúsnige risi a, ọ kọma rukeri-ize a. Kọvu ọ bụ nhne iwhnerne nụ nyerinya jọoko rukeri-ize a, o kpusi risi a.

⁷ Nyerukna kpúsní risi a kwnornu nụ ọ bụ oyiyi ke neegesi igwugwu Chiokike. Kọvu nyerinya neegesi igwugwu ke nyerukna.

⁸ Kwnornu nụ Chiokike híge nụ nyerinya kpụ nyerukna, kọvu híri nụ nyerukna kpụ nyerinya.

⁹ Ọ kpúge nyerukna kwnornu nyerinya, kọvu ọ kpụru nyerinya kwnornu nyerukna.

¹⁰ Kam kpayarụ, kwnornu ele enine izi, nyerinya kwesiri o kpusni risi a, ke neegesi ọ zị nụ mkpururu nzi a.

¹¹ Lele kpa bụdnu nụ rime Nyenwe aị zị, nyerinya zị nyerukna mkpa, nyerukna zị masị nyerinya mkpa.

¹² Kwnornu kpa be kpuru nyerinya hite nụ nyerukna, kpam masị, nyerinya mụnu nyerukna. Kpakara nhne hi n'aka Chiokike va.

¹³ Anụ kpekọm ma ọ bụru ọma nụ nyerinya jeekpe okpukpe gbesa risi a anya.

¹⁴ Iwu okike kwuru nụ nyerukna ke nwernu ogologo rukeri-ize bụnu a nhne iwhnerne.

¹⁵ Kọvu ọ bụru nụ nyerinya ke nwernu ogologo rukeri-ize, ọ bụ igwugwu a, kwnornu nụ rukeri-ize a bụ nhne Chiokike nyernu, o jeeji nookpusni risi a.

¹⁶ Kọvu ọ bụru nụ nye ọbula kwége kpam, nhne me jaakaa bụ, aị mọbu ọgbako Chiokike nwée omen'ẹli berere karụ kpam.

Wiri Anyasnu Nyenwe aị

(Mat 26:26-29; Mak 14:22-25; Luk 22:14-20)

¹⁷ Gbasiri nhne ke a nookwu kịtna, m jáaja anụ mma. Nhne anụ neeme nụ rime ogbako anụ bu nhne ojo, o búo oma rịa rịa.

¹⁸ Ke mbom, be kannu m nụ agida okewa zi n'esilawuru anụ, m neekweru agwna a.

¹⁹ O dnornu m anya nụ okewa jaaziri n'esilawuru anụ ma nye zi snam whuya iwhne.

²⁰ Nga anụ vakotaru n'otu, anụ váge o ri Wiri Anyasnu Nyenwe aị.

²¹ Kpa anụ neeri, nye obula neeri, o zá nye neese ibne a. Kam kpayaru wiri n'ogwnu agwna badnu nga manya noogbu ele berere.

²² Anụ nwée oro, hne anụ jeeri wiri, nwọ manya? Anụ neeledna ogbako Chiokike anya, kpasị ele nwée nhne iwhnerne? Ndaa nhne anụ pioru me kwu gbasiri nhne ka? Me ja anụ mma sa? Óza! M jáaja anụ mma rịa rịa.

²³ M nahiaru m nhne me znirni anụ n'aka Nyenwe aị Jizosi. N'abalị wam be reru a, Nyenwe aị Jizosi gweruru brẹdi,

²⁴ tūnu Chiokike mmamma, nyawa a, kaa, “Ka bu anọ-ẹhni m ke zinu anụ, anụ neeme ka neechenwanya m.”

²⁵ Kpam masi, nga wiri anyasnu whemernu, o gweru okiko, kaa, “Ka bu okiko ogba-njọ-ẹhni ikne ke ọvnarna m. Nga obula anụ n'ọnwo a, anụ neeme ka neechenwanya m.”

²⁶ Kpa anụ neeri brẹdi ka, n'ọnwo okiko ka, anụ nookwusa ẹnwu Nyenwe aị tem o va.

²⁷ Ka neegesi nù ọ bụru nù nye ọbula ri bredi Nyenwe aị mọbu nwọ nhne hi n'okiko, kpa o kwésige, ikpe anọ-ẹhni Nyenwe aị nù ọvnarna a naama a.

²⁸ Nye ọbula beru ọsno nyosnama ẹhni a sù o ri bredi wam mọbu nwọ nhne hi n'okiko wam.

²⁹ Kwnornu nù nye ọbula ke jeeri mọbu nwọ nhne hi n'okiko wam hne ọ máa anọ-ẹhni Nyenwe aị, neeri, nọonwo ikpe nù risi a.

³⁰ Kam kpayarù, agịda anù zị nù nrịria, agịda anù zá rikne, ele berere nwunam.

³¹ Ọ bụru a beru ọsno nyosnama ẹhni aị, Chiokike jéekpe aị ikpe.

³² Kọvu Nyenwe aị neekpe aị ikpe, naata aị awhnụwhnu, ma a gharù o sno ele zị n'ọwa bụru ele ikpe marnu.

³³ Rụmu nda m, nga anù gbakọru n'otu neeri wiri Nyenwe aị, anù sete ibne anù.

³⁴ Ọ bụru nù wiri nọogwnu nye ọbula, o ri wiri n'oro a, ọ zị ikpe Chiokike ma anù kpa anù gbakọru n'otu.

M jeemekwata nhne ke berere nga me varù.

12

Nkesi ke Enine Nsọ

¹ Rụmu nda m, nhne gbasiri nkesi zị ọdo n'ọdo ke Enine Nsọ, m pioru m anù mahia nhne gbasiri be.

² Anù magwù nù nga anù bụ ele naakwa rẹnwu ke dnarnù mgbu, be duru anù hie apna.

³ M neeme ma anù mahia nù ọ zá nye Enine Nsọ Chiokike noodu jeenwe rikne kaa, “Kọsna Jizọsi.” Ọ zá nye jeenwe rikne kaa nù, “Jizọsi bụ Nyenwe aị,” okwokọlam ma Enine Nsọ hiri n'ọnu a kwu kpm.

4 Agịda nkesi enine zị ọdo n'ọdo, kọvu otu Enine Nso.

5 Agịda apna be jeezne izi, kọvu otu Nyenwe ai.

6 Agịda ọnu zị ọdo n'ọdo, kọvu otu Chiokike wam neenye rikne be jeeji nọornu ọnu.

7 Enine Nso nyernu badnu ọbula nkesi ma ọ bụru mbnarna kpakara badnu.

8 O nyernu otu badnu izi akoniche, nyee nye berere izi ọghobia nhne hite n'otu Enine wam.

9 Otu Enine wam nyee nye berere ọkwnata oву, o nyee nye berere rikne ọ gwọ nrịria.

10 Enine wam masị nyee otu badnu rikne ọ rnu ọnu ndu-ẹhni, nyee nye berere rikne ọ kpọ okwo izi ọma, nyee nye berere rikne ọ mahia nhne zị ichne nu hne enine zị ichne ichne, nyee nye berere rikne o kwu ọka nu riro zị ichne ichne, nyee nye berere rikne ọ tūhnasna ikwu-ọnu.

11 Kọvu ọ bụ otu Enine wam nọornu kpakara nhne, o neenye badnu ọbula nkesi zị ọdo n'ọdo lele kpa o jiri masị a.

12 Ẹhni badnu bụ otu. Kọvu o nwernu agịda nhne zị ọdo n'ọdo ke knekotaru a n'otu. Ọ bụ masị kpa ọ zị n'anọ-ẹhni Karaisi.

13 Kwnornu nu be jiri otu Enine wu ai mini bna n'otu anọ-ẹhni. A bụ ele Ju, ma a bụ ele búo ele Ju, ọhi mọbu nye búo ọhi, be mernu a nwọ otu Enine wam.

14 Ọ búo otu nhne zị n'ẹhni badnu, be zị agịda.

15 Ọ bụru nu ọchi jaakaa, “Kwnornu nu m búla m aka, m búla m nhne zị n'ẹhni,” kị jéeme a ọ gharu ọ bụru nhne zị n'ẹhni badnu.

16 Ọ bụru nu nsni kaa, “Kwnornu nu m búla m anya, m búla m nhne zị n'ẹhni,” kị jéeme a ọ gharu

ọ bụru nhne zị n'ẹhni badnụ.

17 Ọ bụru nụ kpakara ẹhni bụ anya anya, ndaa kpa ọ jọonu nhne? Ọ bụru nụ kpakara ẹhni bụ nsni nsni, ndaa kpa ọ jọonu ẹknarna nhne?

18 Kọvu Chiokike yisiri kpakara nhne zị n'ẹhni badnụ lele kpa o jiri masị a.

19 Ọ bụru nụ kpakara be bụ otu nhne, ndaa hne ẹhni jaazị?

20 Kịtna, agịda nhne zị n'otu ẹhni badnụ.

21 Kam kpayarụ, anya jáakanụ aka, “Ị zá m mkpa.” Mọbu risi kanụ ọchi, “Ị zá m mkpa.”

22 N'ezi, a jéenwe rikne gwuzoli ọ bụru nụ nhne ke zị n'ẹhni ke a neeche nụ be zá rikne zịla.

23 Nhne ke zị n'ẹhni aị ke a neeche nụ be nwée igwugwu, bụ ke a neeledu anya gbasiri be, ele ke tų iwhnerne bụ ele ke a ji iwo nookpusni.

24 Ngeri ẹhni aị ke marnụ mma a zá neeledu a anya. Chiokike n'iwhuru a yisiri ẹhni aị n'otu, o nyernu nhne zị n'ẹhni ke nwée igwugwu, igwugwu ke kakwo.

25 Okewa kwésile ọ zị n'ẹhni, kọvu kpakara nhne zị ọdo n'ọdo n'ẹhni magwụ nhne gbasiri ibne be.

26 Ọ bụru n'otu nhne zị n'ẹhni nọowhnu awhnụwhnu, kpakara ele ke berere sno a whnụ awhnụwhnu. Ọ bụru be znarni otu, kpakara be sno a nwe ovu ọso n'ọnu.

27 Kpakara anụ bụ ẹhni Karaịsi, anụ n'otu n'otu bụ nhne zị n'ẹhni Karaịsi.

28 Chiokike bítaru kpakara nhne kpa o kwesiri n'ogbako a. Ọ bítaru ke mbom, ele izi, ke ẹbo, ele nọokpo okwo, ke ẹto, ele zni nhne, ele nọornu ẹrnu ndu-ẹhni sno be, nụ ele nwernu nkesi ọgwo nrịria,

mọbu ele neeyinu ele berere aka, ele nẹechi ẹchi, nọ ele nookwu ọka nọ riro zị ọdo n'ọdo.

²⁹ Kpakara be búo ele izi, kpakara be búo ele nọokpo okwo, mọbu ele neezni nhne. Ọ búo kpakara be nwernu rikne nọ ẹnu ndu-ẹhni,

³⁰ mọbu gwọ nrịria zị ọdo n'ọdo, mọbu kwu ọka nọ riro zị ọdo n'ọdo, mọbu ọ tughnasna ikwu-ọnu.

³¹ Kọvu nkesi ke kakwo mma gwnọ anọ lele wiri. Kọvu me gesi anọ apna ke kakwo mma.

13

Ọwhnun'anya

¹ Ọ búru m nwernu m rikne kwu ọka nọ riro ele badnọ nọ ke enine izi, kọvu m nwée m ọwhnun'anya, ọka m jọoburu oğbugbo etekne mọbu igele waru-awa.

² Ọ búru m nwernu m nkesi ke ọkpo okwo izi ọma, nọ ọghohia kpakara nhne zị omimi, nọ kpakara nhne ọmuma, ọ búru nọ m nwernu m kpakara ọkwnata ovu ke joovume rugwu, kọvu m nwée m ọwhnun'anya, ọ zá nhne me bú.

³ Ọ búru me nyee ele mboni kpakara nhne me nwernu, mọbu nyee ẹhni m be gba bẹkwu, kọvu m nwée m ọwhnun'anya, ọ zá ọgwo ẹnu me jeekehia.

⁴ Ọwhnun'anya nwernu ọsnuta ovu, nọ ovu ọma. Ọwhnun'anya kwnó awuwa, o mée oknomokno, ọ kpá nganga.

⁵ Ọwhnun'anya mée nhne búo ọma n'anya. Ọ pío nhne ke aka ke a, o nwée ovu owe ẹhni. Ọwhnun'anya zá nọogwnu nhne ojo be mernu a.

⁶ Ọwhnun'anya zá nọonwudna nọ nhne ojo, kọvu ezi ọka neeme ovu ọso a n'ọnu.

⁷ Inwe zá nọogwu ọwhnun'anya. O neekweru kpakara nhne, o nwernu olile anya nọ kpakara nhne, o needi kpakara nhne.

⁸ Ọwhnun'anya zị ọkwnukokwnu. Ọkpo okwo jeebi, riro zị ọdo n'odo jọokwusi. Ọ bụru ọghohia, be jaagawhe.

⁹ Ọghohia aị nọ ọkpo okwo aị zú ozu.

¹⁰ Nga nhne ke zuru ozu varu, nhne ke zúge ozu jaagawhe.

¹¹ Nga me bụ watakiri, m nookwu ọka lele watakiri, m naari ọriri lele watakiri, m ghohiaru m nhne lele watakiri, kọvu nga me sozuru nọ badnu, m gweme kpakara agwa watakiri n'ehni m.

¹² Kwnornu nọ kịtna, a nọowhnu nhne nọ nyno ke nọotu ewheke, kọvu nga wam a jọowhnu ruwhnu nọ ruwhnu. Kịtna, m maam agwna nhne, nga wam m jaamakwo kpakara nhne lele kpa Chiokike magwu m.

¹³ Kịtna, nhne ẹto ka zị, ọkwnata oву, olile anya, nọ ọwhnun'anya. Kọvu ọwhnun'anya kakwo kpakara be.

14

Ọkpo okwo nọ riro ikne

¹ Anọ snornu apna ọwhnun'anya, nkesi ke Enine nọogwunu anọ lele wiri, ke kakwo ibne a, nkesi ke ọkpo okwo izi ọma.

² Nye nookwu ọka nọ riro zị ichne ichne zá nookwunu badnu, kọvu Chiokike. Kwnornu nọ ọ zá nye nọoghohia nhne o nookwu, nhne o nookwu bụ nhne tugwaru otugwa hite nọ rikne Enine.

3 Kọvu nye nọokpo okwo izi ọma nookwunu ele badnu ọka, noowulizo ele badnu olu lele ọro, neezni nhne, naakasi mkpoma.

4 Badnu ke nookwu ọka nu riro zi ichne ichne noowulizo ẹhni a olu lele ọro, kọvu nye nọokpo okwo izi ọma noowulizo ọgbako Chiokike olu lele ọro.

5 Ọ jaamasị m ọ buru nu kpakara anu jookwu ọka nu riro zi ichne ichne. Kọvu ọ ka mma, ọ buru nu kpakara anu kpo okwo izi ọma Chiokike. Kwnornu nu nye nọokpo okwo izi ọma Chiokike zi okne onu ahia kakwo nye nookwu ọka nu riro ichne ichne, okwolem ma ọ zi nye jootuhnasnanu ọgbako Chiokike nhne o nookwu, ma be wulizo ọgbako Chiokike olu lele ọro.

6 Ọ buru me vakwnusi anu nookwu ọka nu riro ichne ichne, mbnarna kini nhne anu jeenwe n'aka m, okwolem ma m nookwu nhne Chiokike kpumennu m mọbu nhne omuma mọbu ọkpo okwo izi ọma mọbu zni nhne?

7 Nhne ke nwée budnu lele opi mọbu ọbo, ọ zá nye jaamahia nhne ọ nọogwnu n'eri ọ buru nu be gbúgele a kpa ọ buru ọma.

8 Ọ buru nu nye nọogbu ọkwodu gbúgele a nkari, ọ zá nye jeejiknernu o zne ọgwnu.

9 Kpam masi, ọ buru nu i kwúkwala ọka nkari, ọ zá nye jọoghohia nhne i nookwu, ọ buru nu i kwu ọka nu riro zi ichne ichne. Ruwhere joovu ọka i.

10 Ọ bu n'ezi n'agida ikwu-onu zi n'owa. Ọ zá ke nwée nhne ọ naakasi.

11 Ọ buru nu m ghóhiage m nhne badnu nookwu, m bunu m nye wam nye ẹli berere, nye wam masi bunu m nye ẹli berere.

12 Ọ bụ masị kpa ọ zịnu anụ. Hne nkesi ke Enine nọogwnu anụ, anụ gbalị nwehịa masị nkesi ke jeewulizọ ọgbako Chiokike olu lele ọro.

13 Nye nookwu ọka nụ riro zị ichne ichne, kpe okpukpe ma ọ tūhnasna ikwu-ọnu a.

14 Ọ bụru me kpe okpukpe kpa nụ riro zị ichne ichne, enine m neekpe, kọvu echiche m nwée igwe nụ rime a.

15 Ndaa nhne me jeeme? M jeeji enine m nū echiche m kpe okpukpe, m jeeji masị enine m nū echiche m gwnū eri.

16 Kpa ị naaznarni Chiokike nū rime enine, nye izne ke zị nū rime ọgbako jéenwe rikne kwe Amim, kwnornu nū o máa nhne i nookwu.

17 Ị nọotunu Chiokike mmamma nkari nkari, kọvu nhne i neeme zá noowulizọ nye wam olu lele ọro.

18 M nọotunu Chiokike mmamma kwnornu nū m nookwu ọka nū riro zị ichne ichne kakwo kpakara anụ.

19 Kọvu nū rime ọgbako Chiokike, ọ bụru ọma me kwu mkpuru ọka isne ke ele badnū jọoghohia, zni be nhne, karu o kwu nri pokwu ọka ọ zá nye jọoghohia.

20 Rumu nda m, anụ ghó rumu takiri nū n'oriri anụ, kọvu anụ bụru rumu takiri nū hne mmehie zị, anụ bụru dimkpa nū ọghohia anụ.

21 Be gbaru a n'okwukwo nsọ, kaa,

“M jeeji ikwu-ọnu ele ẹli berere,

kwunu ele ka ọka,

m jeeji masị mgbele-ọnu ele ẹli berere

kwunu ele ka ọka,

kọvu be kwéle o bnonu m nsni.”

Ka bụ nhne Nyenwe aị kwuru.

²² Riro zị ichne ichne bụ nhne elekema ele kwé ekwe, ọ bụo ke ele kweru ekwe. Ọkpo okwo izi ọma Chiokike bụ ke ele kweru ekwe, ọ bụo ke ele kwé ekwe.

²³ Ọ bụru nụ kpakara ọgbako Chiokike gbako n'otu, kpakara anụ nookwu ọka nụ riro zị ichne ichne, ọ bụru ele izne mọbu ele kwé ekwe va n'esilawuru anụ, be jáakaa nụ kpakara anụ bụ ele ẹra?

²⁴ Kọvu ọ bụru kpakara anụ nọokpo okwo izi ọma Chiokike, nye kwé ekwe mọbu nye izne va n'esilawuru anụ, be jootu a mmehie a n'anya, kpakara nhne ọ nurnu jaama a ikpe.

²⁵ Nhne tugwaru otugwa ke zị n'ovu a jowhnuya iwhne. Ọ jaadna kpọ risi ẹli nyee Chiokike, kwuhia, “N'ezi ọka nụ Chiokike zị n'esilawuru anụ.”

Okpenu Chiokike n'ahiri n'ahiri

²⁶ Rumu nda m, nhne me nookwu bụ ka, nga anụ gbakọru n'otu, anụ ji ọgwnu eri, anụ ji iznizni, nye berere jigwu nhne be kpumennu a, nye berere ji riro zị ichne ichne, nye berere nọtuhnasna nhne be nookwu. Kpakara nhne bụ ma be wulizo ọgbako Chiokike olu lele ọro.

²⁷ Ọ bụru nye ọbula kwu ọka nụ riro zị ichne ichne, be jaazị badnụ lawuru, mọbu ke kakwo ẹto. Otu kwukwo, ibne a kwu, otu badnụ tūhnasna nhne be nookwu.

²⁸ Ọ bụru nụ ọ zá nye jootuhnasna nhne be nookwu, nye wam nookwu nụ riro zị ichne ichne daziri bii, nye wam kwunu ẹhni a ọka, kwu masinu Chiokike ọka.

29 Badnụ lawuru mọbu ẹto kpọ okwo izi ọma Chiokike, ele berere tule nhne be neezni.

30 Kọvu ọ bụru nụ otu dazigwu ẹli nụ rime ọgbako nwehịaru izi n'aka Chiokike, nye nookwu ọka daziri bii.

31 Kpakara anụ jeenwe rikne kpọ okwo izi ọma Chiokike otu n'otu, ma kpakara anụ mụhia nhne, kpakara anụ nwehịa nkasi ovu.

32 Enine nye nọokpo okwo noobnonu nye nọokpo okwo nsni.

33 Kwnornu nụ Chiokike bụo nye ẹyiriya, kọvu nye udno.

Lele kpa ọ zị nụ kpakara ọgbako Chiokike,

34 ele rinya daziri bii nụ rime ọgbako Chiokike. Be kwú ọka, be bụo ele risi lele kpa Iwu kwuru.

35 Ọ bụru nụ be pioru ọ mahia nhne ọbula, be sịkwa nzi be n'oro. Ọ bụ nhne iwhnerne nụ nyerinya jookwu ọka nụ rime ọgbako Chiokike.

36 Kini masi? Ikwu-ọnu Chiokike ọpanizoru nhne anụ zị sa? Mọbu ọ bụ anụ kpọi bụ ele ọ vakwnusiri?

37 Ọ bụru nụ nye ọbula neeche nụ ọ bụ nye nọokpo okwo izi ọma, mọbu nye nwernu nkesi enine, nye wam marnụ nụ nhne me naagbanụ anụ n'okwukwo bụ nhne Nyenwe aị nyernu n'iwu.

38 Nye bnóge nsni nụ nhne ka, anụ bnónu a nsni.

39 Rụmu nda m, kam kpayarụ, ọkpo okwo izi ọma Chiokike nọogwnu anụ lele wiri, anụ bnósnì ele nookwu ọka nụ riro ichne ichne.

40 Anụ gweru ovu dūru ẹli mee kpakara nhne kwesiri n'apna bụru ọma, ma n'ahiri n'ahiri.

15

Olizo n'ẹnwu Karaịsi

¹ Kịtna, rụmu nda m, m neechenwanyanụ anụ izi ọma wam me znirni anụ, ke anụ nahịaru, bụ ke anụ gwuzogwu n'olu a.

² Chiokike znọhiaru anụ hite n'izi ọma ka, ọ bụru nụ anụ bita nhne me znirni anụ, okwolem ma anụ kweru n'etekne.

³ M nyernu m anụ nhne me nahịaru, ke zị okne mkpa, nụ Karaịsi nwurru kwnornu mmehie aị, lele kpa be gbarụ a n'ọkwukwo nsọ.

⁴ Be liri a, Chiokike mernu o hi n'ẹnwu lizo n'ọbochi ke ẹto, lele kpa be gbarụ a n'ọkwukwo nsọ.

⁵ O mernu Pita whnụ a anya, omekwo, ele izi nri nụ ẹbo wam whnụ a anya.

⁶ Omekwo, o mernu nhne nụ lele ele kakwo riwhu badnụ isne whnụ a anya otu mgba, ele bụ rụmu nda aị. Agwna be zị bụdnu dụ tna, kọvu agwna be dnarnụ n'anyarna ẹnwu.

⁷ Omekwo, Jemisi whnụ a anya, nụ kpakara ele izi.

⁸ N'ipne-aznụ, o mernu m m whnụ a anya, me nye be murnu lele nnwọ ká aka.

⁹ M bụ m nye zikakworu matị n'esilawuru ele izi, m kwésile m be sukwu m nye izi, kwnornu nụ m mekparụ m ọgbako Chiokike ẹhni.

¹⁰ Kọvu hite n'oru Chiokike, m bụ m nhne me bụ. Oru o nyernu m bụo n'etekne. Kọvu m dọligburu m ẹhni m n'ernu kakwo kpakara ele izi, ọ bụ n'ezi nụ ọ bụo me nọornu, kọvu oru Chiokike nọornu ẹrnu nụ rime m.

¹¹ Kam kpayarụ, ọ bụ me, mọbu be, a znirni izi ọma, kam bụ nhne anụ kweru.

*Olizọ n'ẹnwu ele
nwụrnu ẹnwu*

¹² Ọ bụru nụ izi ọma aị bụ nụ Karaịsi hiri n'ẹnwu lizọ, ndaa kpa agwna anụ naakaa nụ ele nwụrnu ọnwu zá neelizọ n'ẹnwu?

¹³ Ọ bụru nụ ele nwụrnu ọnwu zá neelizọ n'ẹnwu, o neegesi nụ Karaịsi híge n'ẹnwu lizọ.

¹⁴ Ọ bụru nụ Karaịsi híge n'ẹnwu lizọ, izi ọma a znirni anụ bụ nhne etekne, ọkwnata ovu anụ bụ masị nhne etekne.

¹⁵ Tụkwasi n'olu a, a bụ ele akebne aghalaghala megidne Chiokike, a naagba akebne megidne Chiokike nụ o mernu Karaịsi hi n'ẹnwu lizọ, nye o méne o hi n'ẹnwu lizọ, ọ bụru nụ ele nwụrnu ọnwu jéelizọ n'ẹnwu.

¹⁶ Kwnornu nụ ọ bụru nụ ele nwụrnu ọnwu jéelizọ n'ẹnwu, Karaịsi híge n'ẹnwu lizọ.

¹⁷ Ọ bụru nụ Karaịsi híge n'ẹnwu lizọ, ọkwnata ovu anụ bụ nhne etekne, anụ zị kọriri nụ mmehie anụ.

¹⁸ Kam neegesi nụ ele dnarnụ n'anyarna ẹnwu bụ ele kweru nụ Karaịsi whuru etekne.

¹⁹ Ọ bụru nụ okwokọlam nụ budnu ka a zị bụ hne a nwernu ọkwnata ovu nụ Karaịsi, a bụ ele be kwesiri ọ dọnu obirizi kakwo kpakara ele wu n'ọwa.

²⁰ N'ezi ọka, Chiokike mernu Karaịsi hi n'ẹnwu lizọ, bụ mkpuru mbọm ke ele nwụrnu ọnwu.

²¹ Kpa ẹnwu hiri n'aka badnụ va, kпам masị, olizọ n'ẹnwu hiri n'aka badnụ va.

²² Kwnornu nụ kpakara badnụ nwụrnu ẹnwu nụ rime Adam, kпам masị, Chiokike jeeme kpakara badnụ ziri budnu nụ rime Karaịsi.

23 Kọvu nye ọbula n'ige ke a, Karaịsi bụ mkpuru mbom, omekwo, kpakara ele kweru nụ Karaịsi nga ọ jaava.

24 Omekwo, okwukwo kpakara nhne jaava, nga Karaịsi lụgburu kpakara rikne, nụ ele nęechi ęchi, nụ kpakara iknernema, o jeenyewhete Chiokike Nda ęli-eze a.

25 Kwnornu o jaachị tem ọ bīta kpakara ele irno nụ mkpururu ọchi a.

26 Nye irno ipne-aznụ o joolulu bụ ęnwu.

27 Kwnornu nụ ọkwukwo nsọ kwuru, “Chiokike bītaru kpakara nhne nụ mkpururu ọchi a.” A magwụ nụ Chiokike zá n'esilawuru kpakara nhne ka, nye bītaru kpakara nhne nụ mkpururu Karaịsi.

28 Nga kpakara nhne daziri nụ mkpururu Karaịsi, Karaịsi jaadazị nụ mkpururu nye wam bītaru kpakara nhne nụ mkpururu a, ma Chiokike buru nye nęechi kpakara nhne.

29 Ọ buru nụ ele nwurnu ọnwu zá neelizo n'ęnwu, mbnarna kịni bụ nhne ele be nọowu mini kwnornu ele nwurnu ọnwu jeenwe? Kịni kpayarụ be nọowu be mini kwnornu ele nwurnu ọnwu?

30 Ndaa nhne mernu a neeze budnu ige ọbula?

31 M zị m n'ọnu ęnwu kpakara ọbochi. Rumu nda m, m nookwu ka kwnornu nụ m jị m anụ naanya risi, anụ zị nụ rime Karaịsi Jizọsi Nyenwe aị.

32 Ọ buru lele badnụ etekne me nụ anọhia ojo luru ọgwnu nụ Efesọsi, ndaa nhne me jeenwehia? Ọ buru nụ ele nwurnu ọnwu zá neelizo n'ęnwu, “Ngwa ma a ri, nwọ tna,

kwnornu ekile a jọonwu.”

33 Anụ kwé be duwhu anụ. “Ele enyi ojo noolulu agwa ọma.”

34 Anya dno anụ nụ risi, anụ méé mmehie. Agwna anụ máa Chiokike. M nookwu ka ma iwhnerne tū anụ.

Anọ-ẹhni a jeenwe

35 Kọvu agwna anụ jaakaa, “Ndaa kpa ele nwurūnụ ọnwu jeelizo? Ndaa anọ-ẹhni be jeenwe?”

36 Jì nye iwhnirniwhno. Nga ì kpasiri mkpuru n'ẹli, o jóofu okwolem ma ọ beru ọsno nwụ.

37 Nhne ì kpasiri n'ẹli bụ mkpuru etekne, mkpuru ìkpa, mọbu mkpuru berere, ọ búo isisi.

38 Chiokike jeenye mkpuru wam ẹhni ke masiri a. O neenye mkpuru ọbula ẹhni ke a.

39 Kpakara anọ-ẹhni búo otu, badnụ nwernu anọ-ẹhni, anọhia nwernu anọ-ẹhni ke berere, ọnwunu nwernu anọ-ẹhni ke berere, aznụ anọ-ẹhni berere.

40 Anọ-ẹhni ke oligwe zì, anọ-ẹhni ke ọwa zì masì, ọma mma ke oligwe zì, ọma mma ke ọwa zì masì.

41 Mma ke ẹhnam zì ichne, ẹnwa nwernu ọma mma ke a, mma ke mbọ zì ichne, mma ke mbọ zì ọdo n'odo.

42 Kpam masì bụ kpa olizo n'ẹnwu zì, anọ-ẹhni ke be kpasiri n'ẹnwu nwernu rikne ro oro, nga Chiokike gwelizo a, o jóoro oro.

43 Be kpasiri a n'iwhnerne, Chiokike gwelizo a n'igwugwu, be kpasiri a n'inwe ọgwugwu, Chiokike gwelizo a n'iknerna.

44 Be kpasiri a anọ-ẹhni etekne, Chiokike gwelizo a n'anọ-ẹhni ke enine. Anọ-ẹhni ke etekne zì, anọ-ẹhni ke enine zì masì.

45 Kwnornu be gbarụ n'ọkwukwo nsọ, “Adam badnụ mbom bụ badnụ ke zì bụdnụ.” Kọvu Adam ke ipne-aznụ bụ Enine ke neenye bụdnụ.

46 Anọ-ẹhni ke enine bége ọsno, kọvu anọ-ẹhni etekne, omekwo, ke enine sno a.

47 Adam ke mbom bu rịzna ke ọwa, Adam ke ẹbo hi n'oligwe va.

48 Lele badnu be jiri rịzna kpọ, bu kpa ele ke rịzna bu, ele ke oligwe nu lele nye wam hi n'oligwe va.

49 Lele kpa a vuru oyiyi ke badnu ke rịzna, kpa masi bu kpa a joovuru ke oligwe lele badnu wam hi n'oligwe va.

50 Rumu nda m, ka bu nhne me nookwu, kwnornu anọ-ẹhni nu ọvnarna jéekheja ẹli-eze Chiokike. Nhne jọonwu ọnwu jéekheja nhne jọonwu ọnwu.

51 Le, me kanu anu nhne miri emi, o buo kpakara ai jọonwu ẹnwu, kovu be jaagbanwo kpakara ai,

52 n'ige mati, n'otu nsnabi anya, nga okwodu ipne-aznu dnarnu. Kwnornu nu be jọogbu okwodu, ele nwurnu ọnwu jeelizọ róge oro, be jaagbanwo ai.

53 Kwnornu nu anọ-ẹhni ke jooro oro jooworu anọ-ẹhni ke jóoro oro, anọ-ẹhni ke jọonwu ẹnwu jooworu anọ-ẹhni ke jọonwu ẹnwu.

54 Nga anọ-ẹhni ke jooro oro wokparu anọ-ẹhni ke jóoro oro, anọ-ẹhni ke jọonwu ọnwu woru anọ-ẹhni ke jọonwu ọnwu, nhne be gbaru n'okwukwo nsọ jeemezu, "Be megburu ẹnwu."

55 "Enwu, ndaa hne mmeri i zi?

Enwu, ndaa hne nhne ogbuga i zi?"

56 Nhne ogbuga ẹnwu bu mmehie, iknernema mmehie bu iwu.

57 Kovu a nootunu Chiokike mmamma nye neenye ai mmeri hite nu Nyenwe ai Jizosi Karaisi.

58 Rụmu nda m, ele me whnuru n'anya, anụ gwuzosi rikne, anụ kwéko be whome anụ, anụ gweru kpakara mkpoma anụ nọonu ọnu Nyenwe aị ige ọbula, hne anụ magwu nụ ọnu anụ nụ rime Nyenwe aị jowhu etekne.

16

Otu iwai ke rụmu Chiokike

1 Gbasiri iwai be jootunu rụmu Chiokike ke zi nụ Judiya, anụ mee kpa me kannu ọgbako Chiokike ke zi nụ Galasia.

2 N'ọbochi mbom ke ikwezu, nye ọbula bita iwai ichne lele kpa o nwernu, ọ bitakwata a nkari ma anụ zoma ọ tu iwai nga me jaava.

3 Nga me varu m jaagba okwukwo izi nyee ele anụ ọhiaru, m zizne be gwezne nkesi anụ nụ Jeruselem.

4 O buru nụ ọ buru oma, me nụ be joosno zne.

Oriasno Polu

5 Nga me zne zuru Masidonia, m jaavakwnusi anụ, kwnornu m jeezne Masidonia.

6 Me nụ anụ jaadazi ige mati mọbu tem okirika whe, ma anụ yinu m aka m zne hne ọbula me jeezne.

7 M piole m ọ whnu anụ ige mati, kovu m pioru m me nụ anụ daziri gbu okwnu, ọ buru nụ Chiokike kwe.

8 Kovu m jaadazi hna nụ Efesosi du ọbochi Pentikosi.

9 Kwnornu nụ be gbamannu m okne onuhna ọnu izi oma hna, kovu agida ele neemegidne m zi masi.

10 Ọ bụrụ nụ Timoti va, anụ kwéko ogwnu tų a kpa ọ zị n'esilawuru anụ, kwnornu nụ ọ nọornu ọnu Nyenwe aị lele me.

11 Ọ zá nye ledna a anya, anụ yinu a aka ma o lizo izne a n'udno, vakwnusi m. M neele anya ya nụ rụmu nda aị.

12 Nhne gbasiri nwene aị rukna Apolosi, m riasnornu m a agida ige ma ya nụ rụmu nda aị va lekasi anụ, kovu o jiknene ọ va kitna. Ọ jaava nga o nwehjaru oghere.

13 Anụ sama anya anụ, anụ gwuzosi rikne n'okwnata ovu, ovu si anụ rikne, anụ gho ele dikne.

14 Anụ gweru owhnun'anya rnu kpakara ọnu anụ.

15 Anụ magwu nụ ele ọro Stefanasi bu ele mbom ghoru ele Karaisi nụ Akaya. Be ji kpakara nhne be nwernu nọornu ele Chiokike ọnu. M naariasno anụ,

16 anụ bita ehni anụ nụ mkpururu ele nụ kpa nụ nye obula ke ji mkpoma be snornu be nọornu ọnu.

17 Ovu sọru m n'onu nga Stefanasi nụ Fotonatosi nụ Akaiкосi varu, be mesirni owu anụ ke kọru m.

18 Be vulizoru ovu m nụ ovu anụ masi. Ele nụ kpa kwesiri be hnata be ama.

19 Ọgbako Chiokike ke zị nụ Esia neebekwu anụ. Akwila nụ Prisila nụ ogbako Chiokike zị n'oro be ji rehna Nyenwe aị neebekwu anụ k'agida.

20 Kpakara rụmu nda ele zị hna neebekwu anụ. Anụ bekwurita ibne anụ lele rụmu nda.

21 Mawa, Polu, ji aka m naagba obekwu ikwu ka.

22 Be vu nye obula ke whnuge Nyenwe aị n'anya onu. Nyenwe aị, vaa.

23 Oru ke Nyenwe aị Jizosi dazinu anụ.

²⁴ Ọwhnun'anya m nọ rime Karaiṣi Jizọsi dazinu
kpakara anọ.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89